

“PLUI FIGOS PAR FURLAN”. VEJU I VINCIDÔRS DAL CONCORS ARLEF

Premiâts i miôr selfie dal progjet “Fûrxfur” a Gusti di frontiera, Friuli Doc, Suns Europe

A son Admir Adrovic di Cividât, Sabine Vilote di Maian, Rose Savani di Morteau e Mariute Archidiacono di Udin i ultins vincidôrs de edizion 2015 dal concurs fotografic “Fûrxfur a colps di selfie” promovût te Vierte passade de ARLeF. Ducj i participants aes manifestazions plui popolârs che si son davueltis intal 2015 in Friûl (Gusti di frontiera, Friuli Doc, Suns Europe) a jerin stâts invidâts a scatâ un selfie cjarin e originâl cul furlan come sogjet e cjariâlu intal spazi di Instagram. I miôr scats a àn vinçût une batarie externe par celulârs e une schirie di materiâi e gadget firmâts ARLeF. Ma il concurs al è stât dome che un dai elements di sucès dal progjet Fûrxfur che al ambîs a promovî il status de lenghe furlane, in tantis formis, dentri dai events regionai di plui grant sucès di public.

«L'intindiment de Agenzie, pe prime volte, al è stât chel di meti a sisteme une schirie di azions metudis in vore ancje in passât par promovî l'ûs de lenghe furlane intai grancj events – al sclarîs il president, Lorenzo Fabbro -. Dut il teritori regionâl al è stât cjapât dentri tal progjet Fûrxfur - Fûr pâr furlan - cuntune schirie di iniziativis coordinadis par rinfuarçâ la presince e l'ûs dal furlan intes formis plui modernis, preseedis di ducj, massime dai zovins. E je parude une idee in stât di unî in maniere positive e sinergjiche - al conclût Fabbro - politiche linguistiche e promoziun dal teritori».

Inte suaze di Fûrxfur, la Cooperative Informazione Friulana, che e à gjestît il progjet, e à providût ancje al servizi di traduzion dai materiâi promoziunai dai singui events e a fâ spot promoziunai e trasmissions in direte su Radio Onde Furlane. Cun di plui, di volte in volte, in acuardi cui operadôrs teritoriâi, Fûrxfur al à proponût concerti, leturis par fruts, animazions plurilenghals, presentazion di libris. La ARLeF e je stade presinte ai apontaments cuntun spazi espositîf dongje di chel di Fûrxfur dulà che a son stâts distribuîts materiâi informatîfs e promoziunai che a invidavin lis personis al ûs de lenghe furlane in ducj i lûcs de quotidianitât.

Par restâ in contat cu lis novitâts dal progjet Fûrxfur, si pues iscrivisi ae pagine Facebook: <https://www.facebook.com/groups/furXFUR/>.

Udin, ai 4 di Març dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
 Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<